

"Službene novine TK" broj: 01/07

Na temelju članka 9. članka 23. Zakona o ministarstvima i drugim organima uprave Tuzlanskog kantona ("Službene novine Tuzlanskog kantona", br. 17/00, 3/01, 12/03 i 10/05) i članka 19. Zakona o buci ("Službene novine Tuzlanskog kantona", br. 10/04), ministar prostornog uređenja i zaštite okoliša u Vladi Tuzlanskog kantona, donosi

PRAVILNIK

o uvjetima izdavanja suglasnosti za obavljanje stručnih poslova mjerenja buke

Član 1.

Ovim Pravilnikom propisuju se uvjeti za obavljanje stručnih poslova mjerenja buke.

Član 2.

Mjerenje buke mogu obavljati pravne osobe registrirane za obavljanje stručnih poslova mjerenja buke koje imaju opremu sukladno sa važećim propisima i koji su ovlašteni od strane Ministarstva prostornog uređenja i zaštite okoliša (u daljem tekstu Ministarstvo).

Član 3.

Za dobijanje suglasnosti za obavljanje stručnih poslova mjerenja buke pravne osobe moraju biti registrovane za obavljanje te djelatnosti i ispunjavati uvjete propisane ovim Pravilnikom.

Pod uvjetima u smislu stavka 1. ovog članka smatraju se: potreban broj zaposlenih sa odgovarajućom stručnom spremom, odgovarajući radni prostor i tehnička opremljenost.

Član 4.

Za obavljanje stručnih poslova mjerenja buke pravne osobe moraju imati:

1. najmanje jednog zaposlenog visoke stručne spreme -tehničkog smjera, sa najmanje 3 godine iskustva u struci;
2. radni prostor u vlasništvu ili zakupu koji ispunjava urbanističko-tehničke uvjete, a pravnoj osobi omogućava da može obaviti postupak utvrđivanja i ispitivanja, osim za one postupke koji se po prirodi stvari obavljaju na otvorenom prostoru;
3. tehničku opremu sa atestiranim mjernim uređajima i ostalu opremu kojom se osigurava pouzdanost mjerenja buke a koja je izrađena sukladno preporukama IEC 651 i 804 Type 1.

Član 5.

Pravna osoba koja dobije suglasnost za obavljanje stručnih poslova mjerenja buke mora se pridržavati uvjeta za mjerenje buke propisanih čl. 20., 21., 22. i 23. Zakona o zaštiti od buke ("Službene novine Tuzlanskog kantona", br. 10/04).

Član 6.

Pravnoj osobi koja ispunjava uvjete iz članka 4. ovog Pravilnika može se izdati suglasnost za obavljanje stručnih poslova mjerenja buke, sukladno Zakonu o zaštiti od buke uz uvjet da nivo buke mjeri i vrednuje prema međunarodnim standardima ISO 1996-1, 1996-2 i 1996-3.

Član 7.

Rješenje o izdavanju suglasnosti, odnosno rješenje o odbijanju zahtjeva zbog neispunjenja uvjeta iz članka 4. ovog Pravilnika donosi Ministarstvo.

Rješenje o izdavanju suglasnosti za obavljanje stručnih poslova izdaje se na period od dvije godine. Nakon isteka roka imalac suglasnosti je dužan Ministarstvu podnijeti novi zahtjev za izdavanje suglasnosti, te priložiti dokaze o ispunjenju uvjeta propisanih rješenjem.

Protiv rješenja iz stavka 1. ovog članka može se izjaviti žalba Komisiji za drugostupanjsko upravno rješavanje Vlade kantona.

U postupku donošenja rješenja iz stavka 1. ovog članka primjenjuju se odredbe Zakona o upravnom postupku ("Službene novine Federacije BiH", broj 2/98).

Član 8.

Rješenje iz članka 7. ovog Pravilnika donosi se po zahtjevu pravne osobe, koja je uz zahtjev dužna priložiti:

"Službene novine TK" broj: 01/07

1. akt o osnivanju pravne osobe, odnosno izvadak iz registra društava s podacima o sadržaju djelatnosti,
2. popis uposlenih s dokazom o njihovoj stručnoj spremi, opis radnog iskustva, naziv i adresa pravnih osoba kod kojih su bili zaposleni (kopija iz radne knjižice),
3. dokaze o ispunjavanju uvjeta tehničke opremljenosti,
4. dokaze o posjedovanju odgovarajućeg radnog prostora,
5. kratak opis dosadašnjih aktivnosti na poslovima mjerenja buke (ukoliko su mjerenja vršena).

Član 9.

Stručna komisija formirana od strane Ministarstva prostornog uređenja i zaštite okoliša utvrđuje ispunjavanje uvjeta za obavljanje stručnih poslova mjerenja buke na temelju pismeno priloženih dokaza i neposrednim uvidom radnog prostora i tehničke opremljenosti.

Stručna komisija ima najmanje tri člana.

Član 10.

Ministarstvo je dužno u roku od 30 dana od dana uredno podnijetog zahtjeva za izdavanje suglasnosti za obavljanje stručnih poslova mjerenja buke donijeti rješenje iz članka 7. ovog Pravilnika.

Član 11.

Troškove rada Komisije iz članka 8. stavak 1. ovog Pravilnika snosi podnositelj zahtjeva.

Član 12.

Pravnoj osobi oduzet će se suglasnost za obavljanje stručnih poslova mjerenja buke ako se inspekcijskim nadzorom utvrdi da je prestalo, ispunjavati propisane uvjete, odnosno ako u roku određenim rješenjem o inspekcijskom nadzoru ne otkloni utvrđene nedostatke.

Član 13.

Ministarstvo vodi evidenciju svih pravnih osoba kojima je izdato rješenje kojim se daje suglasnost za obavljanje stručnih poslova mjerenja buke.

Evidencija iz stavka 1. ovog članka sadrži:

- naziv pravne osobe,
- broj i datum izdavanja rješenja o davanju ili oduzimanju suglasnosti.

Član 14.

Popis pravnih osoba kojima je izdata ili oduzeta suglasnost za obavljanje stručnih poslova mjerenja buke objavljuje se u "Službenim novinama Tuzlanskog kantona".

Član 15

Ovaj Pravilnik stupa na snagu danom objavljivanja u "Službenim novinama Tuzlanskog kantona".